

Na osnovu člana 32. stav (1) tačka i) Poslovnika o radu Predsjedništva Bosne i Hercegovine („Službeni glasnik BiH“, broj: 10/13, 32/13, 22/14 i 54/24), a u vezi sa članom 18. stav (4) Zakona o budžetu institucija Bosne i Hercegovine i međunarodnih obaveza Bosne i Hercegovine za 2025. godinu („Službeni glasnik BiH“, broj 70/25), Predsjedništvo Bosne i Hercegovine, na 186. vanrednoj sjednici, održanoj 31. marta 2026. godine usvojilo je

## **PRAVILNIK**

### **O DODJELI SREDSTAVA INTERVENTNE TEKUĆE REZERVE ZA VRIJEME PRIVREMENOG FINANSIRANJA INSTITUCIJA BOSNE I HERCEGOVINE U PERIODU JANUAR-MART 2026. GODINE**

#### **Član 1.**

(Predmet Pravilnika)

Ovim pravilnikom o dodjeli sredstava interventne tekuće rezerve za vrijeme privremenog finansiranja institucija Bosne i Hercegovine u periodu januar-mart 2026. godine (u daljem tekstu: Pravilnik) uređuje se način, postupak i kriteriji za dodjelu sredstava interventne tekuće rezerve, ustupljenih Predsjedništvu Bosne i Hercegovine (u daljem tekstu: Predsjedništvo) prema Zakonu o budžetu institucija Bosne i Hercegovine i međunarodnih obaveza Bosne i Hercegovine za 2025. godinu, a za vrijeme privremenog finansiranja institucija Bosne i Hercegovine za period januar-mart 2026. godine.

#### **Član 2.**

(Visina sredstava)

Sredstva interventne tekuće rezerve u skladu sa Instrukcijom o korištenju interventne tekuće rezerve za vrijeme privremenog finansiranja institucija Bosne i Hercegovine u periodu januar-mart 2026. godine, broj: 05-16-2-7293-2/25, od 19. januara 2026. godine, u iznosu od 270.000,00 KM dodjeljuju članovi Predsjedništva, u jednakim omjerima – svaki u iznosu od 90.000,00 KM, prema namjenama i svrsi u skladu sa ovim pravilnikom.

#### **Član 3.**

(Odluka o kriterijima)

Članovi Predsjedništva će donijeti pojedinačne odluke o kriterijima za dodjelu sredstava interventne tekuće rezerve, u skladu sa ovim pravilnikom.

#### **Član 4.**

(Korisnici sredstava)

- (1) Sredstva interventne tekuće rezerve se dodjeljuju fizičkim i pravnim licima u Bosni i Hercegovini koja iskažu potrebu za tim na način opisan u ovom članu.
- (2) Lice iz stava (1) ovog člana potražuje sredstva interventne tekuće rezerve podnošenjem pisanog zahtjeva ili molbe prema članu Predsjedništva, sa izraženom namjenom i svrhom utroška ovih sredstava.
- (3) Uz pisani zahtjev iz stava (2) ovog člana prilaže se i prateća dokumentacija koja dokazuje osnovanost zahtjeva.

Član 5.

(Dodjela sredstava)

- (1) Na osnovu dostavljenog zahtjeva ili molbe iz člana 4. stav (2) ovog pravilnika, član Predsjedništva donosi posebnu odluku o dodjeli sredstava interventne tekuće rezerve, ukoliko zahtjev ili molbu odobri, u skladu sa kriterijima propisanim u stavu (3) ovog člana i kriterijima propisanim odlukom iz člana 3. ovog pravilnika, ukoliko je odluka sačinjena.
- (2) U odluci iz stava (1) ovog člana se navodi fizičko lice/pravno lice kojem se dodjeljuju sredstva interventne tekuće rezerve, iznos i namjena dodijeljenih sredstava.
- (3) Kriteriji za dodjelu sredstava interventne tekuće rezerve su: humanitarne potrebe, podrška obrazovanju, razvoju duhovnosti, razvoju kulturnog stvaralaštva i sporta, podrška nevladinom sektoru, kao i druge namjene.
- (4) Korisnik sredstava interventne tekuće rezerve dužan je članu Predsjedništva dostaviti izvještaj o utrošku sredstava.

Član 6.

(Objavljivanje odluke)

Odluka iz člana 5. stav (1) ovog pravilnika se objavljuje u „Službenom glasniku BiH“ u roku od deset dana od dana donošenja.

Član 7.

(Pregled odluka)

Sekretarijat Predsjedništva Bosne i Hercegovine periodično priprema pregled odluka o dodijeljenim sredstvima interventne tekuće rezerve i o tome informiše članove Predsjedništva na sjednici.

Član 8.

(Stupanje na snagu)

Pravilnik stupa na snagu danom donošenja.

Broj: 01-50-1-904-2/26  
Sarajevo, 31. marta 2026. godine

**PREDSJEDAVAJUĆI**  
**dr. Denis Bećirović**

